

13/09/1998

Sokong saranan sembahyang hajat

KUALA LUMPUR: Umat Islam di seluruh negara diminta menyahut permintaan Perdana Menteri, Datuk Seri Dr Mahathir Mohamad kelmarin, supaya mengerjakan sembahyang hajat secara individu atau berkelompok dalam usaha mencari kebenaran.

Timbalan Presiden Persatuan kebangsaan Pelajar Islam Malaysia (PKPIM), Muhamad Razak Idris, berkata cadangan Perdana Menteri itu amat baik bagi memastikan kemelut yang berlaku ini dapat diatasi segera.

"Sebagai umat Islam, kita harus yakin sepenuhnya terhadap kekuasaan Allah yang tahu apa sebenarnya berlaku. Hanya pedoman dan petunjuk Allah dapat membolehkan kita mengetahui kebenaran hakiki selain menangkis segala bentuk fitnah dan ketidakbenaran yang kini menjadi budaya di kalangan kita.

"Kita perlu memohon kepada Allah memberi petunjuk dan pedoman bagi memperlihatkan kebenaran berhubung perkara ini," katanya dalam satu kenyataan, semalam.

Kelmarin, Dr Mahathir meminta ahli Umno melakukan sembahyang hajat untuk menentukan kebenaran berhubung dakwaan salah laku bekas timbalannya, Datuk Seri Anwar Ibrahim yang dilucutkan jawatan di dalam kerajaan dan parti.

Menurut Perdana Menteri, sembahyang hajat itu bukan bertujuan untuk membolehkan beliau menang atau Tuhan murka kepada Anwar, sebaliknya bagi membolehkan kebenaran akhirnya menjadi kenyataan.

Sementara itu, Presiden Jamaah Islah Malaysia (JIM), Saari Sungib, menyifatkan peletakan jawatan Yang Dipertua JIM Johor, Norzam Darmin, kelmarin sebagai suatu perkara biasa.

"Peletakan beliau adalah di atas pertimbangan dan keputusannya sendiri," katanya.

(END)